



HANDBÓK FORELDRA

Hagnýtar upplýsingar


UPPLÝSINGAFLÆÐI

Leikskólinn heldur úti heimasíðunni www.lfa.is. Þar má m.a. nálgast upplýsingar um viðburði sem eru á vegum leikskólans, starfið, matseðla, söngtexta og ýmiskonar áætlanir. Myndir af starfinu má finna á heimasíðum okkar, við gætum þess þó að nöfn barnanna komi hvergi fram og við förum þess á leit við foreldra að þeir láti okkur vita ef þeir vilja biðjast undan myndbirtingu barna sinna. Jafnframt er mikið notast við samskipti í tölvupósti til foreldra þar sem viðburðir eru auglýstir og fl. Einnig eru daglega skráðar upplýsingar um líðandi dag á upplýsingatöflu fyrir framan hverja deild sem og dagatal yfir mánuðinn. Nánari upplýsingar um hvert og eitt barn eru skráðar á hverri deild um m.a. hvernig barn mataðist, hvíldist og fleira persónulegt.



TRÚNAÐUR OG TILKYNNINGARSKYLDA

Allt starfsfólk leikskólans er bundið trúnaði og helst sá trúnaður þó látið sé af störfum hjá LFA ehf. Öllu starfsfólki leikskólans ber skylda til að tilkynna til barnaverndarnefndar skv. 20 barnaverndarlögum nr. 80/2002 ef hagsmunum barna er ógnað á nokkurn hátt, s.s. ef grunur vaknar um að barn búi við vanrækslu eða ofbeldi. Skv. 17. gr. barnaverndarlaga nr. 80/2002 gengur tilkynningarskylda framar ákvæðum laga eða siðareglna um þagnarskyldu (Barnaverndarlög nr. 80/2002).



VEIKINDI OG SLYS Á BÖRNUM


Ef barn veikist og fær hita þarf það að dvelja heima þar til það er hitalaust. Fá barn smitandi sjúkdóm verður það að dvelja heima þar til smithætta er liðin hjá. Þetta er nauðsynleg ráðstöfun til að forðast útbreiðslu sjúkdóma í leikskólanum og sjálfsögð tillitsemi við önnur börn.

Það er gert ráð fyrir að börnin taki þátt í öllu starfi leikskólans úti sem inni. Þess vegna getum við ekki tekið á móti veiku barni. Ekki er hægt að hafa börnin inni nema í einn dag eftir veikindi. Mikilvægt er að barn sem kemur í leikskólann hafi heilsu til að taka þátt í öllu starfi hans. Í leikskóla er alltaf meiri hætta á smiti og útbreiðslu algengra umgangssjúkdóma. Veikist barn eða slasast í leikskólanum er strax haft samband við foreldra og brugðist við hverju tilfelli eftir bestu vitund. Mikilvægt er að foreldrar upplýsi kennara skólans ef breytingar verða á símanúmerum svo hægt sé að hafa samband sem fyrst.



LYFJAGJÖF

Kennurum og starfsfólki leikskólans er ekki heimilt að gefa börnunum lyf. Ef barn þarf á lyfjum að halda, ber að haga lyfjagjöfinni þannig að lyfin séu gefin heima en ekki í leikskólanum. Undantekning er gerð þegar um er að ræða lyf sem eru tekin að staðaldri eða astmalyf.





STARFSÁÆTLUN

Starfsáætlun er unnin fyrir hvert leikskólaár og tekur gildi frá 1. september ár hvert. Tilgangur starfsáætlunar er að gera skólaþróun leikskólans markvissa með árangursmiðuðum markmiðum og umbótamiðuðu innra mati. Hún á að sýna kennurum, foreldrum og rekstraraðilum hvernig starf leikskólans gekk á síðasta leikskólaári og hvernig unnið verið að umbótum og nýjum verkefnum á því næsta. Starfsáætlun er lögð fyrir foreldraráð leikskólans til umsagnar og svo fyrir skóla- og frístundaráð til samþykktar.

Bjargir foreldra

Hjá leikskóla LFA starfar fjölbreyttur hópur sérfræðinga í menntun, uppeldi og umönnun ungra barna.

Foreldrar eru hvattir til að nýta sér þær bjargir sem leikskólinn hefur upp á að bjóða.